

## **Dithero tsa Tirelano mo Kutlwanong**

08/2015 Thero ka moletlo wa Epifaniya, e le ka 04. 01. 2015

### **Mo leineng la Modimo o e leng Rara le Morwa le Mowa o o Boitshepo!**

Lefoko le le okamelang beke eno lilotshiwe kuJoh. 1:14b: **"Ra bona kgalalelo e e lebanyeng yo o tsetsweng a le esi, e tswa mo go Rara, a tletse bopelotlhomigi le boammaaruri."**

1. Sefela sa 225-211/219

**2. Thapelo:** Modimo, Rara wa rona yo o mo legodimong, re a go leboga, ka o re rometse Morwao yo o rategang gore re pholosiwe ke ene. Ka moo o re thuse gore moletlo wa ponatshego o nne moletlo wa tshegofatso e kgolo mo go rona, re gopole ditiro tse dikgolo tsa gago kajeno. O re utlwe ka ntlha ya ga Jesu Keresete. Amen.

3. Lefoko la Testamente e kgologolo le kwadilwe mo go Jesaya 60:1-6;

Epistolo ka fa thulaganyong ya 2 e kwadilwe mo go Baefeso 3:2-3-6;

Efangele ka fa thulaganyong ya 3 e kwadilwe mo go Johane 1:15-18.

4. A go ipolelwe tumelo ya bokeresete!

5. Sefela sa 84 - 78/81

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Matheo 2:1-12, e re: "E rile Jesu a sena go tsalelwa kwa Betleheme wa Jutea mo malatsing a kgosi Herote, batlhalefi bangwe ba tswa kwa botlhabatsatsi, ba fitlha mo Jerusalema ba re: 'Kgosi ya Bajuta e e tsetsweng e fa kae? Gonne re bonye naledi ya yona, re le kwa botlhabatsatsi, mme re tsile go mo obamela.' Ya re kgosi Herote a utlwa, a tshoga le botlhe ba Jerusalema nae. A ba a phutha baperesiti ba bagolo botlhe le baruti ba molao ba morafe, a tlotlhomisa mo go bone gore Keresete o tla tsalelwa kae. Ba mo araba ba re: 'Kwa Betleheme wa Jutea; gonne go kwadilwe jalo ke moporofeti ga twe: 'Wena Betleheme wa lefatshe la Juta; ga o mmotlana ka gope mo magosaneng a Juta; gonne mo go wena go tla tswa molaodi yo o tla

disang morafe wa me wa Iseraele.' Ke fa Herote a biletša batlhalefi fa thoko, a ba botsa thata ka ga sebaka se naledi e bonetseng ka sona, a ba a ba romela kwa Betleheme a re: 'Yaang lo tlhotlhomise sentle ka ga ngwana; mme e re lo sena go mmona, lo tle go mpolelela gore le nna ke ye go mo obamela.' Ya re ba sena go utlwa kgosi, ba tsamaya; ba akofa ba bona naledi e ba e bonyeng kwa botlhabatsatsi, ya ba etelela pele, ya ba ya fitlha ya ema e okame felo fa ngwana a leng teng. Ya re ba bona naledi, ba itumela thata ka boitumelo jo bogolo. Ba feta ba tsena mo ntlong, ba bona ngwana, a na le Maria, mmaagwe. Jaanong ba wela fa fatshe, ba mo obamela, ba be ba phutholola matlotlo a bone, ba mo ntshetsa dineo, e bong gouta le maswalo le mera. Mme ya re ka ba laetswe ke Modimo ka toro gore ba se ka ba boela kwa go Herote, ba boela kwa lefatsheng la ga bone ka tsela e sele." Amen.

**8. Thero:** Barategi mo Moreneng, baditšhaba ba gogelwa mo go Jesu. Ke sona se se rutiwang mo Efangeleng ya kajeno. Batlhalefi bale e ne e le batho ba ntlha ba baditšhaba ba ba bonyeng Jesu, fa a ntse a letse mo segopong sa dipitse. Go tloga foo Jesu o bonaditswe le mo go baditšhaba. Le rona re gogetswe mo go ene gore re amogele botshelo ka ene. Ka moo re dira moletlo wa Epifania, re re: Ke moletlo wa rona ba re tswang mo go baditšhaba, gonne re gakololwa, fa Jesu a tlile le mo go rona. Ke boitumelo jo bogolo!

**Baditšhaba ba gogelwa mo go Jesu.**

1. Ba a mmona;

2. Ba a mo rapela;

3. Ba mo ntshetsa dineo.

1. Re utlwa ka ga batlhalefi mo Efangeleng ya kajeno. Ga re utlwe sepe ka ga lefatshe la bone, le e seng ka ga maina a bone. Re a utlwa gore ba ne ba gogwa ka naledi, re a utlwa gore ba ratile thata go bona kgosi e e tsetsweng. Ke Modimo o o ba gogileng ka mokgwa o o gakgamatsang. Ka moo ba tlogetse tsotlhe mo go ba ga gabo, ba ya mo lefatsheng la Jutea gore ba batle ngwana yo o tsetsweng. Kwa Jerusalema ba utlwa Lokwalo lo lo boitshepo lo lo reng: Molaodi yo mogolo, e bong Mesia o tla tswa mo motseng wa Betleheme wa Jutea. Ke tsholofetso ya Modimo e e buang jalo. Lefoko la Modimo le a supa gore naledi e supile boammaaruri. Kgosi Herote o ne a boifa, fa a ne a utlwa mafoko a

batlhalefi. Ke se se gakgamatsang, fa Bajuta ba ba neng ba na le Lokwalo ba ne ba tshwanetse go bolelelwa ke baditšhaba gore ba tsaletswe Mesia. Go ntse jaana: Modimo o simolola ditiro tse dikgolo tsa ona fa thoko. O dira ka tsela e e sa tshwaneng le ya batho. Batlhalefi ba ne ba ya teng, ba gogwa ka naledi. E rile ba goroga kwa Betleheme ba itumela thata, **gonne ba bonye ngwana**. Fa re tlhokomela tirafalo eo, re a lemoga, re a bona gore go diragetse se se kwadilweng gore: "Ke bonwa ke ba ba se kang ba mpatla. Ke reile morafe o o no o sa bidiwa ka leina la me, ka re: Mponang, mponang!"

Batlhalefi ba emela rona ba re tswang mo go baditšhaba, gonne le rona re gogetswe ke Modimo mo go Jesu. Fa re retologa, re a bona gore le tumelo ya rona ke kgakgamatso e kgolo. Ga re itse gore go diragetse jang. Ke Modimo o o itseng. Ke ona o o re reretseng Efangele e e re gogetseng mo go Jesu Keresete, Mopholosi wa rona. Ka moo dipelo tsa rona di tletse boitumelo gore re leboge Modimo. Re itumetse, gonne le rona re bonye Jesu ka boutlwelo-botlhoko jwa Modimo. Re mo leseding le le fetang kgalalelo ya lefatshe lotlhe. Re batho ba ba tshegofaditsweng thata!

2. Batlhalefi ba tsena mo ntlong, ba bona ngwana, ba wela fa fatshe, ba mo khubamela, **ba mo rapela**. Fa re obamela Jesu, ga re bone bogosi le kgalalelo ya gagwe, gonne teng mo segopong sa dipitse re bona ngwana yo o tshwanang le bana botlhe. Mme matlho a batlhalefi a ne a buduloga, ba leba ngwana yole ka matlho a tumelo. Ka go mo obamela, le go mo rapela ba ne ba supa gore ba ipolela, fa Jesu e le Morena wa barena. Ga go na yo mongwe yo o tshwanetseng go bidiwa ka leina le, fa e se Jesu fela. Jesu ke Morena.

Fa re dumela jalo, ga re thole ra direla medimo e mengwe gongwe badimo. Fa re rapela Jesu, re ineela mo go ene fela. Ke tshwanelo gore re ikgaoganye le tsotlhe tse di mo ganetsang. Ka moo re latela sekao sa batlhalefi. Ke se sentle. Ya re ra tlhomamisiwa, ra itatola Satane le ditiro tsa gagwe le mekgwa yotlhe ya gagwe, ra ipolela fa pele ga phuthego gore re tla direla Jesu fela. Re ipoletse jalo, re ne re khubama fa fatshe gore re ineele mo go Jesu ka thapelo ya rona. E ne e se go tshameka fela. E ne e le go atamela fa pele ga sefatlhego sa Modimo, Mong-wa-thata-yotlhe gore re ipolele, fa re le ba gagwe tota. Re a ipolela gore re ba Morena Jesu Keresete yo o re golotseng ka madi a a boitshepo a gagwe mo thateng ya lefifi.

Batlhalefi ba ne ba itumela, ka ba bonye Jesu. A re tlhatlhobeng dipelo tsa rona gore re bone, re lemoge gore a rona re itumela ka ntlha ya gagwe, gongwe nyaya? Baditšhaba ba gogelwa mo go Jesu Keresete. Ba setse ba tlile go ene, ba mo obamela, ba mo rapela. Le rona re gogetswe mo go ene, le rona re a mo obamela, re a mo rapela. Ke tshwanelo gore re dire jalo ka pelo e e ratang go baakanyetsa Jesu felo le manno mo pelong, re tlose tsotlhe tse di sa utlwaneng le ene mo pelong. Ke se se tla dirafalang, fa Modimo o tla mo go rona ka Lefoko le le re reretseng kgololesego e e mo go Keresete Jesu.

3. Baditšhaba ba gogelwa mo go Jesu. **Ba mo ntshetsa dineo.** "Batlhalefi ba ne ba phutholola matlotlo a bone, ba mo ntshetsa dineo, e bong gouta le maswalo le mera." Dineo tsa batlhalefi e ne e le dineo tse batho ba sebaka sele ba tlotlileng kgosi ya bone ka tsona. Fa motho a ne a tla mo kgosing ya gagwe, o ne a tshwanetse go tla a tshotse neo. Batlhalefi ba ne ba supa ka dineo tsa bone gore ba ipolela, fa Jesu e le kgosi ya bona.

E rile ba sena go obamela Morena Jesu, ba mo ntshetsa dineo. Ke sona sekao sa batlhalefi. Dineo tsa rona tse re supang ka tsona gore Jesu ke Morena wa rona ke dife? Di teng. Di dintsi. Neo e kgolo e e tshwanetseng, e re ka lebogang Morena ka yona ke go mo direla ka thata yotlhe. Ke raya go mo direla ka go dira mo pusong ya gagwe. Fa o leka gore bangwe-ka-wena ba utlwe ka ga Keresete, o ntshetsa Keresete neo. Gongwe, fa o ntsha lekgetho la gago le dikabelo tse dingwe mo nakong e e tshwanetseng ka ngwaga le ngwaga, ka kgwedi le kgwedi, ka Sontaga le Sontaga, o ntshetsa Keresete neo, gonne tšhelete ya lekgetho le ya dikabelo tse dingwe e tla thusa gore tiro ya Morena e tswelele mono mo lefatsheng. Gongwe fa o tshela ka fa tumelong ya gago gore ba bangwe ba bone lesedi la tumelo ya gago, o ntshetsa Keresete neo. Fa o tlhoafala mo tirong ya go godisa bana ba gago gore ba golele mo tumelong ya go dumela mo go Jesu, o ntshetsa Jesu neo. Fa o ya kerekeng ka Disontaga tsotlhe gore tumelo ya gago e tiisiwe, o ntshetsa Jesu neo.

Mme neo e e molemo bogolo ke pelo ya gago. Ke re: Re bulele Jesu dipelo tsa rona gore a kgone go dira mo go tsona ka Lefoko la gagwe ka metlha. Ke fa go tla tlhaga dineo tse tsotlhe tse dingwe, e le maungo a a molemo a tlabologo, a tumelo, a lorato, ka fa Mowa o o Boitshepo o dirang ka teng mo dipelong tsa batho ka Lefoko la ona.

Rona baditšhaba re gogetswe mo go Keresete. Re bonye Mopholosi wa rona ka bopelotlhomogi jwa Modimo. Ka moo re rapela ene, gape re a ipolela gore re tla mo direla

ene fela. E bile re mo leboga ka go mo ntshetsa dineo tse re di amogetseng mo Modimong ka bopelotlhomogi jo bogolo jwa ona gore re direle Jesu Keresete mo pusong ya gagwe. Amen.

**9. Thapelo:** Morena, Rara wa rona, re utlwile gore re laleditswe ke wena ka tsela e e gakgamatsang. Ka tsotlhe re lemoga bopelotlhomogi jwa gago. Rona ba re tswang mo go baditšhaba re ba ntlo ya gago. Ga re kgone go di lebogela ka botlalo, gonne di feta tlhaloganyo ya rona. Re a go leboga, Morena wa rona, ka ntlha ya ga Keresete Jesu, Morena wa rona. Amen. Thapelo ya Morena: Rara wa rona yo o mo legodimong ...

10. Sefela sa 85 - 79/82

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke G. Schulz, ka ngwaga wa 1971<sup>1</sup>/1997/2003/2009/2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.

---

<sup>1</sup> Ga go tlhole go gopolwa gore thero eo e fetoletswe ke mang mo Setswaneng.